

Тайынша Маңы

Тайынша аудандық қоғамдық-саяси газеті
2006 жылдың 3 ақпанынан шыға бастады

№ 8 (918) 24 ақпан 2023 жыл

 facebook.com/tainsha.tany



<http://tainshatany.kz>



tainsha_tan@list.ru

19 наурыз 2023 ПАРЛАМЕНТ МӘЖІЛІСІ ЖӘНЕ МӘСЛИХАТТАР САЙЛАУЫ



ӘДІЛ САЙЛАУДЫҢ АЛҒЫШАРТЫ

Солтүстік Қазақстан облысында Орталық сайлау комиссия төрағасының орынбасары Константин Петров пен комиссия мүшесі Сабилә Мұстафинаның қатысуымен көшпелі семинар-кеңес өтті. Іс-шараға аумақтық, аудандық сайлау комиссияларының мүшелері, саяси партиялардың мүшелері, жергілікті билік және БАҚ өкілдері қатысты.

Іс-шараны өткізудегі басты мақсат – Парламент Мәжілісі мен мәслихаттары депутаттарының кезектен тыс сайлауға дайындықты пысықтап, саяси бәсекені өткізу бойынша туындаған мәселелер мен сұрақтарды тиісті мекемелермен бірге шешу. Семинарды ашқан аумақтық сайлау комиссиясының төрағасы Асқар Сақыпкереев облыстың кезектен тыс сайлауға дайындығы және бүгінге дейін атқарылған жұмыстар туралы баяндады. Баяндамада Парламент Мәжілісіне депутат сайлайтын №24 бірмандаттық аумақтық сайлау округі бойынша 18 ақпанда тіркеу аяқталып, бір орынға үміткер ретінде 13 адам тіркелгені айтылды.

Өз кезегінде ОСК төрағасының орынбасары Константин Петров үгіт-насихат жұмысы қалай басталғанын және көшпелі семинар-кеңесті өткізудің мақсаты туралы баяндады.

– Биылғы сайлаудың бір ерекшелігі – саяси дода кезектен тыс өткізіліп отыр. Парламент Мәжілісінің VIII шақырылымы болып саналатын сайлау мажоритарлық және партиялық тізім болып, екі жүйеде өткізіледі. Қазір депутаттыққа кандидаттардың тіркелуі республика бойынша толық аяқталды. Астана қаласында №2 бірмандаттық сайлау округі бойынша 42 адам тіркелді. Бұл – республикадағы ең жоғары көрсеткіш. Осының өзі азаматтарымыздың арасында бұрын болмаған белсенділікті көрсетіп отыр. Бірақ бұл бізге қосымша жауапкершілік жүктейді, – деді К.Петров. Одан әрі К.Петров жаңадан енгізілген тәртіпті қарастырып, туындауы мүмкін мәселелерді қалай шешуге болатынын талқылау үшін көшпелі семинар-кеңес ұйымдастырылып отырғанын айтты. Сондай-ақ комиссия төрағасының орынбасары биылғы науқанның қаржылық шығындары барынша ашық болатындығы ескерілгенін жеткізді. Осыған байланысты ОСК-ның осы мәселе бойынша барлық сұраққа жауап беруге әзір екенін де атап өтті. Семинар барысында байқаушылардың жұмысына енгізілген өзгерістер, YEҰ қатарынан тіркелетін барлық байқаушыға кедергі болмайтыны туралы да айтылды. Сонымен қатар ОСК төрағасының орынбасары бірмандаттық сайлау округінен сайланған депутатты кері шақырып алу тәртібі қайта енгізілгенін түсіндіріп өтті.

– Егер депутат өз міндетін орындамады деген сайлаушылар болса, оны қайта шақырып алу жөнінде бастама көтере алады. Бұл үдеріске жеке адамдардың да бастамашы болу мүмкіндігі қарастырылған, – деді ол.

Жиында сайлау комиссияларының материалдық-техникалық жарақтандырылуы туралы облыс әкімі аппаратының жетекшісі Олжас Ыдырысов баяндады. Семинар-кеңестің соңында аумақтық, аудандық сайлау комиссияларының мүшелері өздерін толғандырған сұрақтарға жауап алды.

Жақсыбай САМПАТ,
журналист, қоғам қайраткері.

ХАЛЫҚ СЕНІМІ – БАСТЫ ҚҰНДЫЛЫҚ

Еліміз жаңа саяси бетбұрыстың алдында тұр. 19 наурыз күні өтетін Парламент Мәжілісі және мәслихат депутаттарының кезектен тыс сайлауы – осы бағыттағы үлкен қадам болмақ. Саяси додаға түсуге бел буған жеті партия құрылтайларын өткізді. Кандидаттар ресми тіркелді. Нағыз саяси тартыс енді қыза түспек. Үгіт-насихат кезеңі басталысымен, үміткерлер жұрттың алдына шығып, сайлаудалы бағдарламаларымен таныстырып жатыр. Іске сәт!

Демократиялық негіздерге бағытталған сайлау нәтижесі мемлекетіміздің тұғырын нығайтып, халқымыздың әлауқатын жаңа деңгейге көтеруге сеп болар деген сенім мол. Себебі халық үлкен өзгерістерден сапалы нәтиже күтеді. «Бұл ән бұрынғыдан өзгереді» демекші, бұл сайлаудың ерекшелігі көп. Саяси науқан нағыз Жаңа Қазақстанның алғашқы көрінісі деуге толық негіз бар. Себебі енді халық қалаулылары пропорционалды-мажоритарлық жүйе бойынша сайланады. Бұл үрдіс елімізде саяси бәсекелестік ортаны қалыптастырып, жаңа тұлғалардың саясатқа араласуына жол ашатыны анық. Елдің болашағына бейжай қарамайтын, саяси оқиғаларды ақылмен саралайтын азаматтар өзін-өзі ұсынып, додаға түсіп жатыр.

Саяси тартыс басталып кетті. Қайда барсаң да, елдің аузында сайлау жайлы әңгіме. Партиялық тізімдерін өткізген еліміздегі барлық 7 партия әр дауыс үшін күресуге ниетті. Жаңадан тіркеліп, саяси аренаға енді қадам басқан партиялардың өзі халықтың ыстық ықыласына, зор сеніміне ие болатынын айтып, бәсекелестіктің шоғын үрлей түсті. Жақтастары көп, бұған дейінгі сайлауларда мол тәжірибе жинап үлгерген партиялар да қарап қалмасы анық. Не десек те, әр дауыс ауадай қажет. Ол үшін халықтың сеніміне ие болу маңызды.

Орталық сайлау комиссиясының кезекті отырысында саяси науқандағы маңызды мәселелер талқыланды. ОСК төрағасы Нұрлан Әбдіров сайлау үдерістеріне елеулі қоғамдық қызығушылық пен белсенділік, сондай-ақ ағымдағы сайлау науқанында жоғары бәсекелестік азаматтарға өзін-өзі ұсынуға мүмкіндік беретін сайлау заңнамасының жаңалықтарымен ерекшеленетінін атап өтті.

Парламент Мәжілісі мен мәслихаттарының депутаттығына кандидаттарды бірмандаттық округтер бойынша тіркеу қорытындылары туралы Орталық сайлау комиссиясы төрағасының орынбасары Константин Петров баяндама жасады.

Ол 29 бірмандаттық аумақтық сайлау округтері бойынша Парламент Мәжілісінің депутаттарын сайлау бойынша 609 кандидат ұсынылғанын хабарлады. Атап айтқанда, 7 саяси партиядан 79 кандидат, төрт қоғамдық бірлестіктен 5 кандидат тіркелді, ал 525 үміткер немесе кандидаттардың 86,21%-ы өзін-өзі ұсынушылар болды. 29 сайлау округі бойынша Парламент Мәжілісінің депутаттығына кандидаттарды тіркеу қорытындылары келесідей: 435 кандидат тіркелді, яғни бір мандатқа 15 адамнан келеді. Ең жоғары бәсекелестік Астана қаласында, бір мандатқа 41 және 42 кандидаттан, сондай-ақ Алматы қаласында бір мандат үшін 37, 33, 34 кандидаттан тіркелген. Ең азы – Түркістан облысының №25 округінде тіркелді, олардың саны 5 кандидат.

Өзін-өзі ұсыну тәртібімен 359 кандидат тіркелді, бұл жалпы тізімнің 82,53%-і, саяси партиялардан 76 кандидат өтіп, 17,47% болды. Тіркелген кандидаттардың 350-і немесе 80,46%-ы ерлер, 85-і немесе 19,54%-ы әйелдер. Орташа жасы – 49,34 жас. Кандидаттар арасында 10 этностың өкілдері бар.

Аудандық сайлау комиссиялары ұсынған мәліметтер негізінде ұсынылған 609 кандидаттың 45-і тіркелгенге дейін жеке өтініштері негізінде алынып тасталғаны, 435 кандидаттың тіркелгені, 125 кандидатқа тіркеуден бас тартылғаны және 4 кандидаттың тіркелуі жойылғаны анықталды.

Мәслихаттар депутаттарын сайлау жөніндегі аумақтық сайлау комиссияларының мәліметтеріне сәйкес бір мандатқа 10 288 кандидат немесе 3-тен астам адам тіркелді: облыстық, республикалық маңызы бар қалалардың және Астананың 334 бірмандаттық аумақтық сайлау округтері бойынша мәслихаттарға үміткер болып

1 451 кандидат тізімге енді, қалалық мәслихаттар депутаттарын сайлау бойынша 2 114 кандидат, аудандық мәслихаттарға 6 723 кандидат тіркелді. 6 359 кандидат не-

месе 61,81% өзін-өзі ұсыну тәртібімен, 3 929 кандидат немесе 38,19% әртүрлі саяси партиялар мен басқа да қоғамдық бірлестіктер атынан саяси додаға түсіп отыр. Тіркелген кандидаттардың 7494 немесе 72,84%-ы ер адамдар, 2794 немесе 27,16%-ы әйелдер. Орташа жасы – 42, 64 жас. Кандидаттар арасында 39 этностың өкілдері бар.

Сондай-ақ отырыс шеңберінде аумақтық сайлау комиссияларының ағымдағы науқанның барысы және бірмандаттық аумақтық сайлау округтері бойынша барлық деңгейдегі мәслихаттар депутаттығына кандидаттарды тіркеу қорытындылары туралы есептері тыңдалды.

ОСК төрағасы кандидаттарды тіркеу рәсімдері конституциялық нормаларға сәйкес жариялық және ашықтық қағидаттарында жүргізілгенін атап өтті. Сайлау комиссиялары азаматтардың конституциялық құқықтарын іске асыру үшін қажетті шаралар қабылдады.

Нұрлан Әбдіров күн тәртібіндегі екінші мәселе Парламент Мәжілісі мен мәслихаттарының депутаттығына кандидаттың сайлау алдындағы үгітті жүргізуге жұмсайтын шығыстарының мөлшерін белгілеумен байланысты екенін айтты.

Осы мәселе бойынша Орталық сайлау комиссиясының мүшесі Сабилә Мұстафина баяндама жасады. Ол «Қазақстан Республикасындағы сайлау туралы» Конституциялық заңның 28-бабының 3-тармағына сәйкес мемлекет кандидаттарға өз бағдарламаларымен шығу үшін қаражаттың тең бөлінуіне кепілдік беретінін хабарлады. Қаражат бөлу тәртібі мен көлемін Орталық сайлау комиссиясы айқындайды.

Осылайша, Қазақстан Республикасы Парламенті Мәжілісінің депутаттығына кандидаттар үшін партиялық тізімдер бойынша кандидаттардан басқа шығыстар мөлшері 950 мың теңге көлемінде белгіленеді. Оның 450 мың теңгесі теледидардан және радиодан бағдарламаларымен сөз сөйлеуге, сондай-ақ мерзімді баспа немесе желілік басылымдарында 2 мақала жариялауға, 300 мың теңгесі сайлау алдындағы жария іс-шараларды өткізуге және үгіт материалдарын шығаруға, 200 мың теңгесі көлік шығыстарына арналады.

Облыстар, республикалық маңызы бар қалалар және астана мәслихаттарының депутаттығына кандидаттар үшін партиялық тізімдер бойынша кандидаттардан басқа 550 мың теңге көлемінде шығыстар мөлшері белгіленеді. Оның ішінде: 350 мың теңге – теледидардан және радиодан бағдарламаларын таныстырып сөз сөйлеуге, сондай-ақ мерзімді баспа немесе желілік басылымдарында 2 мақала жариялауға, 130 мың теңге – сайлау алдындағы жария іс-шараларды өткізу және үгіт материалдарын шығаруға – 100 мың теңге және көлік шығыстарына жұмсалады.

Қалалық мәслихаттардың депутаттығына кандидаттар үшін шығыстар мөлшері 350 мың теңге көлемінде белгіленеді. Оның ішінде: теледидардан және радиодан бағдарламаларымен сөз сөйлеуге, сондай-ақ мерзімді баспа немесе желілік басылымдарында 2 мақала жариялауға – 200 мың теңге, сайлау алдындағы жария іс-шараларды өткізу және үгіт материалдарын шығаруға – 100 мың теңге және көлік шығыстарына – 50 мың теңге бөлінеді.

Аудандық мәслихаттардың депутаттығына кандидаттар үшін 350 мың теңге көлемінде шығыстар мөлшері белгіленеді. Оның ішінде: теледидардан және радиодан бағдарламаларымен сөз сөйлеуге, сондай-ақ мерзімді баспа немесе желілік басылымдарында 2 мақала жариялауға – 200 мың теңге, сайлау алдындағы жария іс-шараларды өткізу және үгіт материалдарын шығаруға – 100 мың теңге және көлік шығыстарына – 50 мың теңге қарастырылған.

Күн тәртібіндегі үшінші мәселе бойынша Орталық сайлау комиссиясының хатшысы Мұхтар Ерман сөз сөйледі.

Ол халықаралық байқау институты ашылғаннан бері 10 шет мемлекет пен 3 халықаралық ұйымнан 82 байқаушы аккредиттелгенін хабарлады. Бүгін аккредиттеуге 1 шет мемлекет пен 1 халықаралық ұйымнан 15 байқаушының кандидатуралары ұсынылды. Олардың арасында Иран Ислам Республикасынан 1 байқаушы және Тәуелсіз Мемлекеттер Достастығының байқаушылар миссиясынан 14 кандидатура бар.

Оралхан АХМАДИЯ,
portal@egemen.kz

БИЫЛ КІМДЕР ДЕКЛАРАЦИЯ ТАПСЫРАДЫ



Табыс және мүлік декларациясы

Қазақстан жалпыға бірдей декларациялау жүйесіне енді. Осылайша, осы жылдың 1 қаңтарынан бастап мемлекеттік мекемелер мен квазимемлекеттік секторлардың қызметкерлері өз табысы және мүлкі туралы декларация тапсыруы тиіс.

Жалпы, 15 шілдеге дейін декларацияны қағаз түрінде ұсынуға мүмкіндік бар. Ол үшін мемлекеттік кірістер органына немесе халыққа қызмет көрсету орталығына жүгіну қажет. Ал электронды түрде толтыру мерзімі 15 қыркүйекке дейін жалғасады. Бүгінгі таңда азаматтар үшін декларацияны онлайн толтыру тиімді болып отыр. Бұл ретте cabinet.salyk.kz, egov.kz порталдарын немесе «Esalıq Azamat» мобильді қосымшасын пайдалануға болады. Атап өтер болсақ, жалпыға бірдей декларациялауды енгізу сыбайлас жемқорлықтың алдын алуға жол ашпақ. Осылайша, елімізде 2024 жылы заңды тұлға өздерінің кірістері мен мүліктері туралы есеп берсе, 2025 жылдан бастап барлық жеке тұлғалар деректерін мәлімдейді.

Еске салайық, Қазақстанда тиісті санаттағы азаматтардың декларацияны ұсынбағаны, есеп беру мерзімін бұзғаны үшін әкімшілік жауапкершілік көзделген. Алдымен декларацияны тапсырмаған немесе тапсыру мерзімін кешіктіргендерге ескерту жасалады. Егер бұл әрекетін бір жыл ішінде қайталайтын болса, 15 айлық есептік көрсеткіш шеңберінде айыппұл салынады.

Ал жеке табыс салығы бойынша декларацияда толық әрі анық емес мәліметті ұсынар болсаңыз, мұнда ескерту беріледі. Кейін 3 айлық есептік көрсеткіш көлемінде айыппұл салынуы мүмкін.

Дәрігерлер мен мұғалімдер есеп береді

Қазақстанда жалпыға бірдей декларация тапсыру міндеті 2021 жылы енгізілген болатын. Бастақыда лауымды мемлекеттік қызметкерлер, мемлекеттік функцияны орындауға уәкілетті және оларға теңестірілген адамдар өз кірісін жариялауға міндеттелді. Жұбайларына да дәл сондай талап қойылған.

Ал 2023 жылдың қаңтарынан бастап оларға тағы бірқатар қызметкер қосылды. Олар: мемлекеттік мекемелердің қызметкерлері (білім беру, денсаулық сақтау, мәдениет, спорт және тағы басқа салалар) және олардың жұбайлары;

квазимемлекеттік сектор субъектілерінің жұмыскерлері және олардың жұбайлары.

Осылайша, биыл дәрігерлер, мұғалімдер, спорт пен мәдениет қызметкерлері, сондай-ақ, ұлттық компаниялар мен басқарушы холдингтердің мамандары декларация тапсыруға міндеттеледі. Қандай декларацияны толтыру керек

Жалпыға бірдей декларация тапсырудың

бастапқы сатысында барлығы активтер мен міндеттемелер туралы декларацияны (250.00 формасы) толтырып тапсырады. Оны бір рет қана ұсынады. Артынан жыл сайын кіріс пен мүлік туралы декларацияны (270.00 формасы) жіберіп отыру қажет. Сонда салық органдары түскен табысты қарап, бұған дейінгі декларациямен салыстырып отырады.

250 формасында қандай мәліметтер көрсетіледі

Алғашқы декларацияда біраз мәліметті көрсету керек. Олар:

Қазақстаннан тыс жердегі мүлік (жылжымайтын мүлік, жер учаскелері, теңіз және әуе кемелері, көлік мен арнайы техника, тіркеуіштер, шетелдегі банктерде жатқан ақша, заңды тұлғаның жарғылық капиталындағы үлес);

Қазақстандағы мүлік (тұрғын үй құрылысындағы үлес, бағалы қағаздар, инвестициялық алтын, зияткерлік меншік нысандары, авторлық құқық, қолма-қол ақша, кредиттік қарыздар);

Сенімгерлік басқаруға берілген мүлік (жылжымайтын және жылжымалы мүлік, жер телімдері, үйлер, саяжайлар, көліктер).

Үйде қанша ақша сақтауға болады

Бастапқы декларацияда айлық есептік көрсеткіштің 10 000 еселенген мөлшерінен (30 630 000 теңгеден) аспайтын сомасы көрсетіледі. Оны үйде сақтауға болады. Ал жеке тұлғаның қолма-қол ақшасы ол сомадан артық болса, онда оны 2022 жылдың 31 желтоқсанына дейін банктегі есепшотқа салып қою қажет.

Декларацияны қай уақытқа дейін тапсыру керек

Заң бойынша декларация тапсырудың екі мерзімі бар. Олар:

декларация қағазбен тапсырылса, оны 15 шілдеден кешіктірмей апару қажет;

электронды форматта – 15 қыркүйекке дейін; Декларация электронды құжатпен мемлекеттік кірістер комитетінің «Салық төлеушінің кабинеті» (cabinet.salyk.kz), электронды үкімет (egov.kz), сондай-ақ, eSalyq azamat мобильді қосымшасы арқылы жіберуге болады. Ал қағазбен тапсырылса, салық органына, ХҚКО-ға немесе поштаға бару керек.

Декларацияны тағы кімдер тапсырады

Қазақстанның Салық кодексіне сәйкес, жалпыға бірдей декларация тапсырудың төрт кезеңі қарастырылған. Биыл екінші кезең, келесі жылы үшінші кезең басталады. Соның аясында заңды тұлғалардың құрылтайшылары, басқарушылары және олардың жұбайлары, жеке кәсіпкерлер мен олардың жұбайлары декларация тапсырады. Ал 2025 жылы төртінші кезең енгізіледі. Сол кезде халықтың басқа да санаттары мүлік пен ақша туралы есеп беруге міндеттеледі.

БІЛІМ ОРДАЛАРЫНДА БАҚЫЛАУ КҮШЕЙТІЛМЕК

Облыстық әкімдікте өткен жедел кеңес отырысында мектептердегі қауіпсіздікті қамтамасыз ету, әлеуметтік маңызы бар өнімдерге бағаны тұрақтандыру мәселелері қаралды. Өңір басшысы Айдарбек Сапаров 2019 жылмен салыстырғанда тұрақтандыру қорының айналым қаражаты 300 миллион теңгеден 3,6 миллиард теңгеге дейін ұлғайғанын атап өтті. Бірақ 37 сауда орны ғана тартылып отыр.

Облыс әкімі бұл бағыттағы жұмыстарды жетілдіріп, сауда нүктелерін көбейтіп, бірінші қажетті азық-түлік өнімдерімен жеткілікті түрде қамтамасыз етуді, сондай-ақ қарақұмықтың егіс алқабын үш есеге дейін ұлғайтып, дәнді дақылдарды өңдейтін кәсіпорындар ашуды тапсырды. Кеңесте тұрғындардың табысын өсіру мәселелері де талқыланды. Өңір басшысы бірінші жартыжылдықта зауыттардағы бос жұмыс орындарын азайтуды тиісті орындарға жүктеді. Қазір дәнекерлеушілер мен токарлар жетіспейді. Құрылыс саласында да мамандар тапшы. Тас қалаушыларды қайта даярлау үшін қысқарған кәсіпкерлер ашу қажет.

Айдарбек Сапаров облыс орталығындағы №4 мектепте орын алған оқыс жағдайдан кейін бақылауды күшейтуді міндеттеді. «Аудан әкімдеріне мектеп директорларымен кеңес өткізуді тапсырамын. Барлық мәселелерді қатаң бақылауда ұстаңыздар. Мектептерді арнайы күзетпен қамтамасыз ету қажет. Байқауларды жедел өткізіңіздер», – деді өңір басшысы.

Облыс әкімінің баспасөз қызметі.

ХАЛЫҚТЫҢ САНИТАРИЯЛЫҚ-ЭПИДЕМИОЛОГИЯЛЫҚ САЛАМАТТЫЛЫҒЫ САЛАСЫНДАҒЫ БАҚЫЛАУ

Қазіргі уақытта мемлекеттік қызметтер көрсету мемлекеттік органдар қызметінің маңызды және стратегиялық міндеті болып табылады. Көрсетілетін қызметтердің сапасын арттыру мақсатында негізгі бағыттардың бірі барлық қызметтерді электрондық форматқа көшіру болып табылады. Мемлекеттік қызметтерді сапалы көрсету мәселесінің өзектілігі мемлекеттік қызметтер адам өмірінің барлық салаларын және бүкіл кезеңін қамтитындығымен түсіндіріледі. Жыл сайын мемлекеттік қызметтер сұранысқа ие болып келеді. Бұл салаға қызығушылықтың артуы оны заңнамалық деңгейде реттеу қажеттілігіне әкелді. Бұл мемлекеттік органдар қызметінің ашықтығын қамтамасыз етуге мүмкіндік береді. Мемлекеттік қызметтерді алуға өтініш беру рәсімін оңайлату мақсатында көптеген мемлекеттік қызметтер бойынша www.egov.kz. «электрондық үкіметтің» веб-порталы арқылы электрондық өтініш арқылы өтініштер беру көзделген. Бұл функция ЭЦҚ бар барлық интернет пайдаланушыларына қолжетімді. Қазіргі уақытта халықтың санитариялық-эпидемиологиялық саламаттылығы саласында аудандық санитариялық-эпидемиологиялық бақылау басқармасы мынадай мемлекеттік қызметтер көрсетеді:

1) «Халықтың санитариялық-эпидемиологиялық саламаттылығы саласындағы нормативтік құқықтық актілерге және гигиеналық нормативтерге жоғары эпидемиялық маңызы бар объектінің сәйкестігі (сәйкес еместігі) туралы санитариялық-эпидемиологиялық қорытынды беру»;

2) «Тамақ өнімдерін өндіру (дайындау) объектісіне есептік нөмір беру»;

3) «Қоршаған ортаға, санитариялық-қорғау аймақтарына, шикізат пен өнімге зиянды заттар мен физикалық факторлардың шекті жол берілетін шығарындылары мен шекті жол берілетін төгінділері жөніндегі нормативтік құжаттама жобаларына санитариялық-эпидемиологиялық қорытынды беру».

Осы бапта көрсетілген хабарлама «Рұқсаттар және хабарламалар туралы» Қазақстан Республикасының Заңында белгіленген тәртіппен беріледі.

Халықтың санитариялық-эпидемиологиялық саламаттылығы саласындағы мемлекеттік бақылауға және қадағалауға жататын жоғары эпидемиялық маңызы бар объектілердің толық тізбесімен және елеусіз эпидемиялық маңызы бар объектілермен «Халықтың санитариялық-эпидемиологиялық саламаттылығы саласындағы мемлекеттік бақылауға және қадағалауға жататын өнімдер мен эпидемиялық маңызы бар объектілердің тізбесін бекіту туралы» 2020ж. 30.11. №ҚР ДСМ-220/2020 бұйрығы «Әділет» ЖЗШ-да танысуға болады.

Осы мемлекеттік қызметтер (эпидемиялық маңызы жоғары объектінің сәйкестігі (сәйкессіздігі) туралы санитариялық-эпидемиологиялық қорытынды алу, эпидемиялық маңызы шамалы объектінің қызметінің басталғаны және тоқтатылғаны туралы хабарлама) электрондық форматта көрсетіледі, бұл өз кезегінде көрсетілетін қызметті алушылардың мемлекеттік органдармен тікелей байланысын толығымен жояды.

Жұлдыз МӘДИЕВА,

«Тайынша аудандық санитариялық-эпидемиологиялық бақылау басқармасы» РММ статистигі.

Қазақстан Республикасы Парламенті Мәжілісінің, Солтүстік Қазақстан облыстық мәслихатының, Тайынша аудандық мәслихатының депутаттығына кандидаттардың және олардың сенімді адамдарының Тайынша ауданындағы сайлаушылармен

КЕЗДЕСУ КЕСТЕСІ

№	Кандидаттар	Кездесуді өткізу кезеңі	Кездесуді өткізу орны
1	№24 бірмандатты аумақтық сайлау округі бойынша Қазақстан Республикасы Парламенті Мәжілісінің депутаттығына кандидаттар	Сайлау алдындағы үгіт жүргізу кезеңінде үй-жайдың меншік иесі-ұйымның басшысының келісімі бойынша өткізу күні мен уақыты	Солтүстік Қазақстан облысы Тайынша ауданының «Аудандық мәдениет үйі» мемлекеттік коммуналдық қазыналық кәсіпорнының мәдениет үйі, Тайынша қ.
2	Партиялық тізімдер бойынша Қазақстан Республикасы Парламенті Мәжілісінің депутаттығына кандидаттар (№24 округ)		«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Қарағаш орта мектебі» коммуналдық мемлекеттік мекемесі, Қарағаш а. (келісім бойынша)
3	Солтүстік Қазақстан облыстық мәслихатының депутаттығына кандидаттар, №5 бірмандатты аумақтық сайлау округі бойынша		«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Алабота орта мектебі» коммуналдық мемлекеттік мекемесі, Аққұдық а. (келісім бойынша)
4	Партиялық тізімдер бойынша Солтүстік Қазақстан облыстық мәслихатының депутаттығына кандидаттар (№5 округ)		«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Амандық орта мектебі» коммуналдық мемлекеттік мекемесі, Амандық а. (келісім бойынша)
5	Бір мандатты аумақтық сайлау округтері бойынша Тайынша аудандық мәслихатының депутаттығына кандидаттар		«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Большой Изюм орта мектебі» коммуналдық мемлекеттік мекемесі, Большой Изюм а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Донецк орта мектебі» коммуналдық мемлекеттік мекемесі, Донецкое а. (келісім бойынша)
			«Жастар» демалыс орталығы «Жаркөл» Жауапкершілігі шектеулі серіктестігінің Мәдениет үйі, Драгомировка а. (келісім бойынша)
			«Тайынша-Астык» Жауапкершілігі шектеулі серіктестігінің Мәдениет үйі, Зеленый Гай а. (келісім бойынша)
			«Солтүстік Қазақстан облысы Тайынша ауданы Келлеровка ауылдық округі әкімінің аппараты» коммуналдық мемлекеттік мекемесінің Мәдениет үйі, Келлеровка а.
			«Солтүстік Қазақстан облысы Тайынша ауданы Киров ауылдық округі әкімінің аппараты» коммуналдық мемлекеттік мекемесінің ауылдық клубы, Кирово а.
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Красная Поляна орта мектебі» коммуналдық мемлекеттік мекемесі, Красная Поляна а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Летовочное орта мектебі» коммуналдық мемлекеттік мекемесі, Летовочное а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Мионовка орта мектебі» коммуналдық мемлекеттік мекемесі, Мионовка а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Рощинск негізгі мектебі» коммуналдық мемлекеттік мекемесі, Рощинское а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Теңдік орта мектебі» коммуналдық мемлекеттік мекемесі, Теңдік а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Тихоокеан негізгі мектебі» коммуналдық мемлекеттік мекемесі, Тихоокеанское а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің «Чермошьян орта мектебі» коммуналдық мемлекеттік мекемесі, Чермошьянка а. (келісім бойынша)
			«Солтүстік Қазақстан облысы әкімдігінің білім басқармасы» коммуналдық мемлекеттік мекемесінің «Тайынша ауданының білім бөлімі» коммуналдық мемлекеттік мекемесінің №1 «Чкалов орта мектебі» коммуналдық мемлекеттік мекемесі, Чкалово а. (келісім бойынша)
			«Тайынша-Астык» Жауапкершілігі шектеулі серіктестігінің Мәдениет үйі, Ясная Поляна а. (келісім бойынша)

ЖАҢА ҚАЗАҚСТАН – ЖАҢА АРМИЯ



Отанды сүю – міндет, қорғау – парыз! Болашақ жауынгерлерді Отанын сүйетін өз елінің нағыз патриоты болуға тәрбиелеу отбасынан, мектеп қабырғасынан басталады. Бұл барлық мемлекеттік органдардың, оның ішінде білім беру, мәдениет және спорт мекемелерінің, бұқаралық ақпарат құралдарының, ардагерлер ұйымдарының жүйелі жұмысын талап етсе керек. Бұл бағыттағы жұмыстардың бәрі өткен тарихымызды зерделеуге, аталарымыздың Ұлы Отан соғысындағы ерлігін насихаттауға және Жеңістің құндылықтарын бағалауға арналуы керек.

Халықаралық жағдайдың шиеленісуінен, жаңа сын-тегеуріндер мен қауіп-қатерлердің сипатынан сабақ ала отырып, бөлімшелердің жауынгерлік әзірлігі мен жауынгерлік қабілеті ерекше өзектілікке ие болды. Гибридтік соғыстар жауынгерлік дайындықта түбегейлі өзгерістерді қажет етеді. Бүгінде Қазақстан әскери қорғаныс пен шабуылдағы классикалық ұрыс түрлерін қолданудан қазіргі қарулы қақтығыстар тәжірибесіне сәйкес ұрыс дағдыларын игеруге көшті. Бұл қалалық, таулы жерлерде айтарлықтай ұтқыр қимылдайтын, техникалық жағынан жақсы жарақталған, шағын топтардан тұратын заңсыз қарулы топтарға қарсы ұрыс түрі.

Арнайы операцияларды жүргізу мәселелерін пысықтау кезінде басқа да әскерлер мен әскери құрылымдардың бөлімшелерімен өзара іс-қимылдар мен практикалық тәжірибе алмасу ұйымдастырылды. Бұл тәжірибе ротаның елді мекендерде заңсыз қарулы құрылымдарға қарсы жауынгерлік іс-қимылдар жүргізу кезінде негізгі буын болып қала беретінін көрсетті. Сол себепті жеке құрамның да, командирлердің де жылдам өзгермелі жағдайларда сенімді бағдар алып, қолда бар күштер мен құралдарды тиімді пайдалануы өте маңызды болып отыр.

Әлемде қарқынды дамып келе жатқан геосаяси шиеленістер мемлекеттің қауіпсіздігін қамтамасыз ететін басымдықтарға әсер етті. Жоғарғы Бас қолбасшы алдымызға ұлттық қауіпсіздікті қамтамасыз ету жүйесін түбегейлі қайта ұйымдастыру міндетін қойды. Қарулы Күштер оның маңызды құрамдас бөлігі екенін біз жақсы түсінеміз.

Ұйымдастырушылық, техникалық және технологиялық деңгейлерде де оң өзгерістер бар. Ерекше тапсырмаларды орындауға, жедел шешімдер қабылдауға және ведомствоаралық үйлестіруге баса назар аударылатын әскерлердің жауынгерлік даярлық жоспарларына түзетулер енгізілуде. Бұл жерде әскерлерді басқару жүйесінің тиімділігі көбінесе жағдайды объективті талдауға, сандық тәсілдерді енгізуге де байланысты.

Мұндай жағдайда байланыс, радиоэлектронды күрес және барлау құралдары ерекше мәнге ие болмақ. Біз 2022 жылғы қару-жарақ пен әскери техника сатып алу жоспарын қайта қарадық. Сақтау объектілерінің құрылысы мен пайдаланылмайтын оқ-дәрілерді кәдеге жаратуға көлемді жұмыстар атқарылды.

Бұл тапсырмаларды орындау Қарулы Күштердің кадрлық әлеуеті мен әскери білім сапасына да қатысты. Бұл мәселелер Қорғаныс министрлігі басшылығының жіті назарында.

Қысқаша қайырсақ, біздің алдымызда осындай тапсырмалар тұр. Бұл міндеттерді шешу басшылық құрамнан күш-жігерді, дәйекті әрі үйлесімді іс-әрекеттерді талап етеді.

Газет бетін дайындаған:
Жанаргүл МҰРАТҚЫЗЫ.

ӘСКЕРГЕ ТІРКЕУ КУӘЛІГІ БЕРІЛДІ

«Елге ер қымбат, елге ердің адал жүрегі қымбат», деген қағиданы ұстана отырып, болашақ Отан қорғаушыларға тіркеу куәлік табысталды. Ер адамның басты мақсаты – Отанын, отбасын қорғау. Тіркеу куәлігін алу дегеніміз – ересек өмірге қадам басу. Болашақта әскери Білім ошақтарында, әскер қатарында болып, Отан алдында абыройлы қызмет ету – әрбір елін сүйген азаматтың міндетті борышы.

16 ақпанда аудандық мәдениет үйінде болашақ әскерге шақырылушыларға әскери тіркеу куәліктерін салтанатты түрде тапсыру рәсімі өтті.

Болашақ әскерге шақырылушыларға Тайынша ауданы әкімінің орынбасары А.А. Әміренов, Тайынша ауданының қорғаныс істері жөніндегі бөлімінің бастығы, подполков-

ник А.Е.Мұхамбетов, Тайынша ауданы бойынша ҚР ҚК ардагерлерінің төрағасы М.Г.Гусев, Тайынша ауданы бойынша ТЖ бөлімінің бастығы Р.А. Әбдікәрімов, Тайынша ауданының полиция бөлімінің ЖПҚ бастығы Жүсіпов Қ.Т. құттықтау сөз сөйлеп, әскери тіркеу куәліктерін салтанатты түрде табыс етті.

Іс-шара соңында аудандық мәдениет үйінің әдіскері Б.Гусар «Алға Қазақстан» патриоттық әнін орындады. Іс-шараға қатынасқан болашақ ел қорғайтын азаматтар ерекше тебіреніспен өз ойларымен бөлісіп, әскери қызметке, елі үшін ерінбей, адал қызмет етуге дайын екендерін де жеткізді.

Гүл ЖАМАШҚЫЗЫ, Тайынша таңы

ӘСКЕРИ ҚЫЗМЕТ САЛАСЫНДА БОЛҒЫҢЫЗ КЕЛСЕ...

Еліміз тәуелсіздік алған жылдардан бері Қазақстан Республикасының Қорғаныс министрлігі Әскери жоғарғы оқу орындарынан жыл сайын арнайы бөліспен білікті әскери қызметшілерді дайындап келеді. Қорғаныс министрлігінің құзыретіне қарайтын атақты төрт әскери жоғарғы оқу орны бар. Сол оқу орындарымен таныс болыңыз:

1. Талағат Тягелдынев ат. Әуе Қорғаныс Күштері Әскери Институты Батыс Қазақстан облысының Ақтөбе қаласында.

2. Құрлық Әскерлері институты Алматы қаласында.

3. Радиотехника және байланыс әскери-инженерлер институты Алматы қаласында.

4. Шоқан Уалиханов атындағы Әскери колледж (Кадет Корпусы) Щучинск қаласында.

2023 жылы жергілікті басқару органдарынан аталмыш әскери оқу орындарына оқуға түсуге ниетті жастарды іріктеу жүргізіп жатқандықтан түлектерге болашақ мамандықтарын әскери қызмет саласынан таңдауға болатындығына кеңес береміз. Әскери оқуға ниет білдірген жастар Тайынша ауданының Қорғаныс істері жөніндегі бөлімнің бастығының атына наұрыз айының бірінен бастап жазбаша өтініш берулері керек. Ары қарай ӘЖОО жауапты қызметкерлер талапкерлерді арнайы заңдардың негізінде, тиісті тізімге енгізіп, медициналық тексерулерден өткізіп денсаулықтарының жарамдылығын тексертеді. Сонымен қатар оқушының дене шынықтыруы, оқу үлгерімі, моральдық-психологиялық жағдайлары бақылауда болады. Бірыңғай Ұлттық тестілеуден барлығы 50 балл алған ниет білдірушілер әскери оқуға түсе алады. Осы елу баллдың ішінде физика, математикадан кем дегенде 7-10 балл жинау керек екендігін естеріңізге саламыз. Ал, Әскери Колледжге ҰБТ тапсырмай-ақ, аттестаттың қортындысымен жолдама алуға заңды мүмкіншілік береді. Оқуға түскен кандидаттар тегін білім алады. Мемлекеттің қаржысымен толық оқуды аяқтап шығуға арналған Қазақстан Республикасының «Әскери қызмет

және әскери қызметшілердің мәртебесі туралы» заң аясында барлық жеңілдіктерді пайдалана аласыздар. Түлек оқуға түскеннен кейін Қарулы Күштердің қатарында үзбей қызмет етуге 10 жылға келісімшарт жасайды. Осы келісім шарттың жүзеге асуы барысында мемлекеттен тиісті қаржылай жеңілдіктерді пайдалана отырып, тегін әскери баспана алуға қол жеткізе алатындығын басты назарларыңызға алғандарыңыз және балаларыңыздың қызметке тұрып өсуіне жақсы ықпал ететіндігін ата-аналардың ескергендері жөн болмақ.

Сонымен қатар Биыл Ресей Федерациясының әскери жоғарғы оқу орындарына түлектерді қабылдайтын болады.

1. Әскери Университет (Москва қ.) әскери оркестр дирижері мамандығы.

2. А.Ф. Можайский ат. Әскери –космос академиясы, (Санкт-Петербург қ.) Астрономогеодезия мамандығы.

3. Дене шынықтыру мәдениеті (Санкт-Петербург қ.)

4. Астрономогеодезия мамандығы (Санкт-Петербург қ.) әскери қолданбалы дене дайындығы, тау спорты мамандығы.

5. Инженерлік –техникалық әскери институт, (Санкт-Петербург қ.) құрылыс мамандығы бойынша

6. Түркия Қарулы күштерінің құрлық әскерлері училищесі (Анкара қ.)

7. Ереван мемлекеттік медициналық университетінің әскери-медициналық факультеті (Ереван қ.) қарулы күштер қатарындағы емдеу ісі мамандығын меңгереді.

Әскери оқу орындарына оқуға түсуге өз еліміздің әскери оқу орындарымен қатар Ресей Федерациясы, Қытай және Армения елдерінен бөлістер бөлінгендігін назарларыңызға ұсынамыз.

Сіздерді толғандырған тақырыпқа сәйкес мәселелер болса төмендегі жұмыс телефоны арқылы хабарласуларыңызға болады. 23-1-11. 21370.

Арғынбек АҚТАЙЛАҚҰЛЫ,
Тайынша ауданының Қорғаныс істері жөніндегі бөлімнің алғашқы әскери дайындық, жауынгерліктен тыс жұмыс, әскери-техникалық мектептер жөніндегі инспекторы.

ТЕХНИКАЛЫҚ ТЕКСЕРУЛЕР

Қазақстан Республикасы Ауыл шаруашылығы министрлігінің 2015 жылғы 30 наурыздағы №4-3/269 «Жыл сайынғы мемлекеттік техникалық байқау қағидаларын және олардың базасында дайындалған шасси мен механизмдерді, монтаждалған арнайы жабдығы бар тіркемелерді қоса алғанда, олардың тіркемелерін, өздігінен жүретін ауыл шаруашылығы, мелиоративтік және жол-құрылыс машиналары мен механизмдерін, жүріп өту мүмкіндігі жоғары арнайы машиналарды бекіту туралы» бұйрығының негізінде жыл сайынғы мемлекеттік техникалық байқауға көктемгі егіс және егін жинау жұмыстарын жүзеге асыратын машиналар жатады және «Солтүстік

Қазақстан облысы Тайынша ауданы әкімдігінің ауыл шаруашылығы бөлімі» КММ белгіленген кестеге сәйкес машиналардың орналасқан жері бойынша тікелей жүргізіледі (келісім бойынша). Ауыл шаруашылығы техникасын жыл сайынғы мемлекеттік техникалық байқаудан өткізу үшін www.elicense.kz сайты арқылы белгіленген мерзімге дейін 2 (екі) күннен кешіктірмей электрондық форматта өтініш беру қажет. Қосымша ақпарат «Солтүстік Қазақстан облысы Тайынша ауданы әкімдігінің ауыл шаруашылығы бөлімі» КММ-нің <http://oshv-tsh.sko.gov.kz> сайтында орналасқан немесе 8(715)36 22-8-66, 21-4-70 телефондары арқылы хабарласа аласыз.

Өткізу күні	Ауылдық округтің атауы	
24.03.2023	Абай	ЖШС, ШҚ, ФХ, жеке тұлғалар
27.03.2023	Амандық	ЖШС, ШҚ, ФХ, жеке тұлғалар
28.03.2023	Алабота	ЖШС, ШҚ, ФХ, жеке тұлғалар
29.03.2023	Чкалов	ЖШС, ШҚ, ФХ, жеке тұлғалар
30.03.2023	Донецк	ЖШС, ШҚ, ФХ, жеке тұлғалар
31.03.2023	Миронов	ЖШС, ШҚ, ФХ, жеке тұлғалар
03.03.2023	Тихоокеан	ЖШС, ШҚ, ФХ, жеке тұлғалар
04.04.2023	Зеленогай	ЖШС, ШҚ, ФХ, жеке тұлғалар
05.04.2023	Киров	ЖШС, ШҚ, ФХ, жеке тұлғалар
06.04.2023	Яснополян	ЖШС, ШҚ, ФХ, жеке тұлғалар
07.04.2023	Краснополян	ЖШС, ШҚ, ФХ, жеке тұлғалар
10.04.2023	Рощинск	ЖШС, ШҚ, ФХ, жеке тұлғалар
11.04.2023	Келлер	ЖШС, ШҚ, ФХ, жеке тұлғалар
12.04.2023	Летовочный	ЖШС, ШҚ, ФХ, жеке тұлғалар
13.04.2023	Драгомиров	ЖШС, ШҚ, ФХ, жеке тұлғалар
14.04.2023	Большеизюм	ЖШС, ШҚ, ФХ, жеке тұлғалар
17.04.2023	Теңдік	ЖШС, ШҚ, ФХ, жеке тұлғалар
18.04.2023	Чермошнян	ЖШС, ШҚ, ФХ, жеке тұлғалар

Теміржолға жақын орналасқан ауыл тұрғындарына түсіндіру жұмыстары

Тайынша станциясындағы Желілік полиция бөлімшесінің қызметкерлері ауылшаруашылық кәсіпорындарында, теміржол жолдары маңында орналасқан ұйымдарда, теміржол маңында орналасқан ауыл тұрғындарымен және мал бағып жүрген жұмысшыларға тұрақты түрде түсіндіру жұмыстарын жүргізеді.

Бүгінде бақылаусыз мал жаю, оның теміржол бойында пайда болу мәселесі өзекті болып қала береді. Пойыздардың үй жануарларымен соқтығысуы олардың өліміне әкеп соғады, сонымен қатар пойыздар қозғалысының қауіпсіздігіне қауіп төндіреді және экономикалық зиян келтіреді, теміржол және облыстың ауылшаруашылық кәсіпорындары, сонымен қатар жолаушылар пойыздарының жүру кестесін бұзады. Сонымен қатар, шұғыл тежеу немесе соқтығысу нәтижесінде жолаушылар мен локомотив бригадаларының қызметкерлеріне зақым келу қаупі бар. Мал иелері үй-жайларға, қоршауларға малдардың рұқсат етілмеген түрде шығуына жол бермеу үшін осы

үй-жайларды жақсы жағдайда ұстауға міндетті. Сонымен, Тайынша станциясындағы ЖПБ патрульдік полиция тобының полицейі полиция сержанты В.Р. Дробовской теміржол маңында орналасқан ауыл тұрғындарымен және мал бағып жүрген жұмысшыларға

«Теміржол арқылы ат-арба көлігімен (шаналармен) өту және жүк артылған, мініс малды және табынды айдап өту, теміржолдардың бөлінген жолағында мал жаю қағидаларын бұзу» ҚР ӘҚБтК 559 бабы 1 бөлігі бойынша әкімшілік жауапкершілік туралы әңгіме өткізді.

Тайынша станциясындағы желілік полиция бөлімшесінің қызметкерлері теміржол маңында тұратын барлық тұрғындарға үй жануарларына сақ болуына, оларды теміржол мен электржелілері маңына жібермеуіне ескерту жасайды.

Д.Қ. ӘМІРЖАНОВ,
Тайынша стансасы ЖП бөлімшесінің бастығы полиция капитаны.

*Жас кәсіпкерлерге кеңес

ЖАҢА ТЕХНОЛОГИЯЛАР – БІЗДІҢ БОЛАШАҒЫМЫЗ

XXI ғасыр – ғылыми-техникалық прогрестің қарыштайтын дәуірі болмақ. Ақпараттық технологиялар адамға жаңа мүмкіндіктер сыйлап, өмір салтымызды өзгертуде. Заманауи құрал-жабдықтар көптеген салада жаңа бетбұрыс жасады. Бұрын дәстүрлі жолмен табыс тауып келгендер енді өз жұмыстарын қайта қарай бастады. Осынау жаңандық үдерістен бизнес те шет қалған жоқ. Сондықтан да мен ойланбастан өз бизнесімді жаңа технологиялармен байланыстыруды жөн көрдім. Бүгінде менің облыс орталығында тұрақты табыс әкеліп тұрған виртуалды шындық клубым бар.

Ең алдымен, виртуалды шындық дегеннің не екеніне тоқтала кетейін. Виртуалды шындық – техниканың көмегімен жасалған әлем. Адам арнайы көздірік пен қолғапты тағып, сол әлемге сапар шегіп, ерекше әсерге бөлене алады.

Осыдан бірнеше жыл бұрын мен қаламызда достарыммен, отбасыммен демалып, көңіл көтеретін орындардың аз екенін байқадым. Осылайша сауда үйлерінің бірінде виртуалды шындық клубын ашу туралы идея пайда болды. Ол ойымды жүзеге асыру үшін мемлекеттік қолдауға жүгіндім. Алдымен кәсіпкерлік негіздері бойынша білім алып, өткен жылы “Бизнес бастау” байқауының нәтижесінде жас кәсіпкер ретінде 1,3 млн. теңге қайтарымсыз грант иегері атандым. Қаржыға ие болғаннан кейін алдағы мақсат адам көп жүретін жерден кәсіпімді ашуға қолайлы орын іздедім. Тұтынушылардың қолайлылығы үшін соңғы үлгідегі көздіріктерді арнайы тапсырыспен алдырдым. Бұған дейін мен жергілікті серіктестіктердің бірінде бас директор болып еңбек еткендіктен, өз кәсібімді өрге домалату да қиын болған жоқ. “Рахмет” сауда үйіндегі шағын клубымыз аз уақыттың ішінде қала тұрғындарының сүйікті орнына айнала бастады. Күн сайын мұнда орта есеппен 20 адам келеді.

Олар жаңа әсерге бөленіп, көңіл-күйлері көтеріліп, виртуалды әлемнің бар ғажайыбын сезініп қайтады. Заман ағымының алға жылжуына қарамастан, виртуалды әлемді мойындамайтындар да бар. Тіпті демалыстың бұл түрін зиянды деп айыптайтындар да кездесіп жатады. Мен бұл пікірмен келісе алмаймын. Виртуалды көздіріктер адам денсаулығына ешқандай кері әсер етпейді. Керісінше, көңілін көтеріп, позитивті эмоциялар сыйлайды. Біз бала кезімізде мұндайды армандаған да жоқпыз. Ал бүгінгі жастарға осының бәрі қолжетімді. Қабылдамасақ та, құп алсақ та жаңа технологиялар – біздің болашағымыз. Осыны алдағы өмірімізді елестету мүмкін емес. Ғылым дамыған сайын демалыстың осындай түрлері кең етек ала бермек.

Виртуалды шындықтың тағы бір пайдасы – балалардың моторикасын дамытады. Бұл әсіресе церебралды сал ауруына шалдыққан мүгедек балалар үшін аса маңызды. Сондықтан да біз виртуалды шындық клубында ерекше қажеттіліктері бар балаларға тегін қызмет көрсетеміз. Ауыр дертке шалдыққан бүлдіршіндер виртуалды әлемде қызықты ойындар ойнап, моторикасын дамытса, өзге кеңістіктің ғажайыптарын сезініп, көңіл күйі жақсарады. Өкінішке қарай, жарымжан жандар өздері қалаған көп жерлерге бара алмайды. Біз олар үшін бұл кедергіні жойып, армандарының орындалуына себепші боламыз. Бүгінде мен өз кәсібімнің 1 жылдағы жетістіктерімен қуана бөлісіп отырмын. Өзімнен бөлек, тағы бір адамды тұрақты жұмыспен қамтыдым. Жалақы, әлеуметтік, салықтық төлемдер уақтылы аударылады. Бизнесімді кеңейтуге мүмкіндіктер де жоқ емес. Жақында осындай орындарды қаланың бірнеше жері мен облыс аудандарында ашуды жоспарлап отырмын. Осы уақыт ішінде ешқандай мәселе де туындаған емес. Кәсіпкер ретінде өзім де кедергілерді алдын ала болжап, айналып өтуге тырысамын.

Бүгінгі жас кәсіпкерлерге де осындай кеңес берер едім. Бизнес бастаған адам ешқандай қиындыққа қарамастан еңбек етіп, алға қойған мақсатынан адаспауы керек. Қиындықтардан қорқудың қажеті жоқ. Керісінше, ол бізді шыңдап, тұлға ретінде жетілдіреді. Осының бәрін орындаған жанның табысқа жетпеуі мүмкін емес.

Мұрат МАРАТҰЛЫ, кәсіпкер.
“Soltüstik Qazaqstan”

Меншік иесі: «Тайынша таңы» жауапкершілігі шектеулі серіктестігі.

Газет аудан әкімінің қолдауымен шығып, мемлекеттік ақпараттық саясатты жүргізу жөніндегі ресми басылымы болып табылады.

Индекс: 65710

Газет әр аптаның жұма күні шығады.

Директор - Бас редактор
Гүл НҰРАЛИНА



Қазақстан Республикасы Байланыс және ақпарат министрлігі Ақпарат және мұрағат комитетінде 2010 жылы 20 қазанда қайта тіркеліп, №10803-Г куәлігі берілген.

Газет «Тайынша таңы» жауапкершілігі шектеулі серіктестігінің компьютерлік орталығында теріліп, беттеліп, «Старкова А.А.» ЖК-де офсеттік тәсілмен басылған 020000. Көкшетау қаласы, Әуелбеков көшесі, 98 үй.

Тапсырыс: 63. Таралымы: 1300.

МЕКЕН-ЖАЙЫМЫЗ:

Солтүстік Қазақстан облысы, Тайынша қаласы, Қазақстан Конституциясы, 206-үй. БАЙЛАНЫС ТЕЛЕФОНЫМЫЗ: 8 (715-36) 2-19-99

Жарияланған мақала авторларының пікірлері редакция көзқарасын білдірмейді. Қолжазба қайтарылмайды. Келген хаттарға жауап жолданбайды. Жарнаманың келіп түскен материалдардың мазмұны мен мәтініне хабарлама беруші автор өзі жауапты.